







S. VIII. 33.

AD
FUNEBREM SOLEMNITATEM
CONDISCIPULI,
JUVENIS LITERATI ET INGENUI,
FRIDERICI
VVESTPHALII,
STETINENSIS POMERANI,
PARENTUM SUORUM UNIGENITI
DESIDERATISSIMI,
NATI

Ann. ar. clb lbc XXVII. ID. VIII. br.
DENATI,
Ann. ar. clb lbc XLVII. PRID. NON. FEBR.
IN TEMPLO JACOBÆOURBISPATRIÆ
II. FEBR.

CONSUE TIS CEREMONIIS HUMANDI,
STUDIOSA JUVENTUS IN REGIO
GYMNASIO STETINENSI

INVITATUR

RECTORE

M. JOH. MICRÆLIO.

Typis GEORGII GOETSCHII,

Stud.



Vintum Rectoratus mei annum, quo pene egressus sum, sic finiri jam posse credebam, ut, cum haecenus aliquis è Studiosæ nostræ Juventutis cœtu quorannis fato subito ex hac vita surreptus, reliquis exemplum mortalitatis præbere iussus sit, exequialis curæ pro Discipulo tumultando vacuus essem, præsertim quia aliquis Professorum nuper in flore ætatis ereptus, pijs factorum decretis satisfecisse, & nostræ nos fragilitatis sac commonefecisse videtur. Sed ecce cum salvos vos omnes, FILII, existimabam, præter omnem cadit opinionem ingenuus inter vos Juvenis, FRIDERICUS VVESTPHALIUS, Stetinenſis. Primus annus rapuit VVolgastanum; alter Rostochienſem; tertius nobilem Neo-Marchicum; quartus Lübecenſem. Vos, Stetinentes, forte extra teli lethiferi jactum vos credidistis: & propterea oportuit VVESTPHALIUM funus fieri, ut nec vos quicquam ab ætatis robore vel in crastinum vobis porro promittatis. Illius, ut cum Statio loquar,

- - media cecidere abrupta juventa

Gaudia, florentesq; manu scidit Atropos annos:

Qualia pallentes declinant lilia culmos,

Pallentesq; rosæ primos moriuntur ad Austros,

Aut ubi verna novis expirat purpura gratis.

Genæ igitur rubentes, lacerti firmi, cincinnati crisper, omnia in vobis vernantia, ne vobis imponant. A tergo non insidiatur mors, sed in ipsis hæret membris: nec quicquam in vobis vitæ est, nisi quod à sapientia animæ est. Quæ vobis sub specie cutis vel carnis pinguntur, continua morte absorbentur, quia perpetuo fluxui obnoxia sic abeunt per insensibilia effluvia, ut ungues vobis protruduntur & crines: nisi quod hi forpice debeant demeti, reliqua membra ultro quotidie diffuant, ut [substantia eorum] continuo nutrimento sit reparanda. Hic vester Condiscipulus anno ær. Chr. clc lxxc XXVII. ipsis Idibus Octobribus, hora IV. pomeridiana in lucem editus, vix complevit XIX. ætatis annum: quem qui nondum attingistis, unde vobis eum pollicemini? qui superastis, unde crastinum?

Nūm? Pater ejus Amplissimus & Consuleissimus Vir Dn. GRE-
GORIUS WESTPHALIUS, utriusq; Archidicasterij in Pomera-
nia jam ultra biennium vicenarius Advocatus & Procurator, inq;
inclita hac urbe Senator: & Mater, femina lectissima, ANNA HO-
HENHOLZEN ex antiquissima & Patricia familia Hohenholziana,
qvæ in patre ipsius ALBERTO, Senatore urbis, in linea masculina
defecit, hunc unicum habuere filium: Qvot vota putatis pro ca-
ro capite ab illis interposita? ἡ φύσις φιλότακτον, inquit Philoso-
phus ex Euripide: Qvodduncq; peperit natura, ejus amans est. In ali-
qvo liberorum numero, par est parentum in omnes eademq; pie-
tas, dicente Quintiliano, ut habeat quidem in aliquo filio ple-
rumq; proprias indulgentiæ causas, salva tamen caritatis æquali-
tate, sit quiddam, per qvod tacito mentis instinctu singulos rursus
tanqvam unicos amamus, in diversos tamen effusi. Sin in uno o-
mnis affectus vertitur, & universa spes nominis familiæq; ab inte-
ritu vindicandæ in plures non incumbit, atq;

Omnis in Ascanio cari stat cura parentis,
assiduæ pro ejus vita in peritura alioqvin familia sunt depreca-
tiones. Hinc vix sine lacrymis verba, qvibus defuncti juvenis parens,
amicus mihi à teneris in hoc Gymnasio notus & admodum familiaris,
unici filij obitum mihi significavit, lego. Summis viribus se in id
scribit incubuisse, ut filius benè informaretur, eumq; in finem se-
lectos juvenes & Academicos ejus studijs adhibuisse, nullisq; peperc-
isse sumptibus. Jam esse eum ereptum: jam omnem curam o-
mnemq; sollicitudinem frustratam. Librorum magna cura &
sumptibus haud exiguis comparatorum nullum jam heredem, qvi
in illis patrisset, superare. Si orbus parens tam graves de morte
filij necit querelas, qvas eum pro vivo adhuc & spirante preces fu-
disse existimatis? Sed

Lanificas nulli tres exorare puellas

Contigit. Observant, qvam statuere, diem.

Ideoq; & sibi auriculam à Poëta tangi sensit:

Desine fata Deūm flecti sperare precando.

Rata sunt, inquit Seneca, & fixa, atq; magna & æterna necessitate du-
cuntur. Quid si igitur & in vos, vel in hanc horam decreverint ex-
trema? Mors, qvæsi saxum Tantalos semper impender.

*Qvis scit, an adjiciant hodiernæ crastina summæ
Tempora Dij superi?*

*Frustrâ declinatur, quod cœlitus incidit. Condiscipulus hic vester
spes vestris certiores fovere poterat, quia pro unico filio parentum
vota, quæ vobis fortè negantur, audiebantur crebriora: nec tamen
setvari poterat. Caveat quisq; quod cuiquam potest contingere.*

*Interim nobilem annosæ arboris surculum emarcuisse, dole-
mus. Avos defuncti, Proavos & Tritavos & plures ex utriusq; pa-
rentis majoribus, qui multis seculis in Consulari & Senatoria digni-
tate apud nos eminere, huc possemus accersere. Sed cujus genus
laudamus, ejus parentes commendantur, non ipse,*

*Hunc autem juvenem novimus sic à primis incunabulis rerum
suarum sategisse, ut quantum per ætatem fieri potuit, sit ab eo præ-
stitum. Parentes cum devoverant sapientiæ studio, ut quondam
consilij patriam aliosq; juvaret: ipseq; ultro inclinabat in lite-
ras, & deductus primo in Scholam Senatoriam, dein curæ dome-
sticorum Præceptorum ex Academijs evocatorum, commissus,
tandemq; superiori anno V. Cal. Maij in illustre nostrum Gymna-
sium à me introductus, nihil omisit, quod probum decet & inge-
nuum Discipulum. Id omnes, à quibus in literis & pietate Chri-
stiana est informatus, verè testantur, nihil unquam ab eo susceptum,
ob quod severius fuisset corripiendus. Nativa enim probitate indu-
ctus, ab incompotis moribus affectibusq; praviorib; semper sese ab-
stinuit, procul injurijs sodalium, quia, qui neminem unquâ læsit, indi-
gnus omnibus videbatur, qui læderetur. Hinc parentes testantur,
nullas unquam de eo querelas sese inaudisse. Idem affirmamus
Præceptores. Vix autem in numerum meorum Discipulorum re-
ceptus, Musas Gymnasij nostri salutaverat, omni animi nisu jam
illis & Philosophiæ operaturus, cum gravi capitis & cordis mor-
bo correptus, domi pene continuo subsistere cogereretur: & quan-
quam remittebant sæpe Symptomata, & meliora sperabantur, ple-
rumq; tamen mense aliquo circumactò tanto impetu ejusmodi con-
vulsionibus, denuo vexatus est, ut quas in causas Medici morbum
conjecerent, vix invenirent. An præter naturæ vim malignitatis
hominum aliquid indultum sit, solus novit, qui omnia. Duobus
abhinc mensibus post gravem in Recidiva decubitum, & quidem
numero*

numero decimum, rectius habere videbatur, ut vestimentis sibi cir-
 cumjectis ad res agendas esset aptior. Cumq; illuxisset dies à festo
 Purificationis proximus, & defunctus non saltem praevidentibus satis
 integris viribus adfedisset, sed & hymnis pijs decantatis postea diem
 ad horam sextam produxisset, subito dolores coepit sentire acutis-
 simos, & accedentibus cordis & reliquorum membrorum convul-
 sionibus hora sequentis diei sexta matutina, ad meliora evocaretur.
 Sic intra xii horas vires & constabant & affligebantur & prorsus
 evertabantur. Quo anima abierit, ex vita pie antea acta & suspirijs
 sub extremum agonem calidissimis facile est intelligere. Dum vixit,
 se non sibi, sed Deo vivere sciebat. Ideoq; & in Ecclesiae societate
 sacris, quodcumq; per morbos licuit, interfuit, precibus gratiam
 caelestem assidue provocavit, & subinde mystico pane & potu re-
 fectus, se ad hunc casum mature praeparavit. Toto illo tempore, quo
 domi hoc ultimo anno sese continuit, tribus vicibus salutarem Sa-
 cramenti hujus gratiam sibi fieri voluit: & quancquam ob intensis-
 simos capitis dolores, oculorum acies hebescebat, sacris tamen le-
 gendis unice delectabatur, ut paratus esset, quacumq; hora à Sponso
 anima evocaretur. Contigit id, quod dixi hora VI. matutina, die No-
 nas Februarij praecedente: & quidem cum paulo ante obitum mor-
 bi vehementia aliquid remitteret, & adstantes varijs Scripturae Sacrae
 dictis animum in Deum erigerent, omnia intellexit, validisq; suspi-
 rijs, & complicatis manibus devotionem contestatus, placide tandem
 expiravit. Exuviae corporis hodie terrae mandabuntur: cui, ut o-
 mnes & singuli frequenti decentia interfitis, humaniter à parente in-
 vitamini. Anima vivit cum Deo: & erit tempus, quo iterum cor-
 pori, ut in cineres redacto, denuo ad serenioram vitam, quam
 nulli morbi aut damna infestent, uniatur. Plinius quidem mortu-
 orum resurrectionem vocavit puerilia deliramenta, & ridet Demo-
 critum, qui iterari vitam mortemq; credidit, nec tamen revixit ipse.
 Aeschylus etiam exclamat: ἀπὸ τοῦ θανάτου ἐν ἑστῇ ἀνάστασις: quod
 sic exprimit Catullus: Soles occidere & redire possunt:

Nobis, cum semel occidit brevis lux,

Nox est perpetuo una dormienda.

Sanior videtur Phocylides, cum, etsi Gentilis Philosophus, canit:

καὶ τὰ χαῖα δ' ἐν γαίῃς ἐλπίζομεν εἰς φάος ἔλθειν

Δείψαν' ἀποχομένων - - -

Credir

Credimus ē terra in lucem mox prodere posse
Defuncti cineres - - -

Nec opus est, ut quæramus, unde de corporum restitutione Phocylides hæc habuerit. Sibyllas enim vel legerat, vel audierat: quæ per quem de mysterijs fidei edoctæ fuerint, constat. Nec absurda videri potuit corporum in cineres dissolutorū cum anima iterata unio. Qui enim socias præstiterunt sibi operas in vita, si iusta Dei pensites iudicia, in præmijs etiam & pœnis sustinendis omnino sociandi videntur. Est anima princeps causa actionum: solitaria tamen non est. Caro ministra est, etsi anima autor est. Servus quoq; sive puniendus est, si Domino iubente sicam gessisse deprehenditur; sive præmio cohonestandus, si in hostes fortiter egerit. Aut igitur posse Deum corpora resuscitare nega, aut nolle. Si non vult, aut injustum est, aut indignum Deo. Sed injustum non est, quia nec illis, qui ad præmia vel pœnas resurgunt, injuria inferitur, nec alijs, quia, cum suum cuiq; datur, nemo omnino læditur. Nec Deo indignum est, corpora putrefacta in integrum restituere. Si enim, quod minoris est, limum scilicet jungere & corpus condere, quod mori potuit, Deo non est visum indignum, multo minus indignum erit, quod præstantius est, limum animare & corpus immortalitate donatum denuo producere. Si non potest, aut ignorat, quid faciendum, aut, si norit, imbecillior est viribus, quam ut probe efficiat. Sed Deus non ignorat, vel quæ particulam, vel quæ totum, corporum resurrectioni destinatarum naturam. Neq; enim latere illum potest, quo singula ex tabidis membris abierint, & quæ in se elementorum partes putrefacta receperint, & in cognatam naturam admiserint. Et vires Dei sufficere ad corporum restitutionem, si non aliud, probat ipsorum procreatio. Hinc apud Prudentium sic introducitur loqui:

- - Possum renovare favillas

Antiquam in faciem. Nec desperanda potestas:

Qui potui formare novum, reparabo peremptum.

Non igitur sola anima seponitur: Habet & caro suos sinus, interim in aquis, in ignibus, in aëribus, in bestijs, inquit Tertullianus. Nihil igitur officit, quod, ut est apud Lucretium,

- - nostro de corpore sæpe ferarum.

Augescent vires, & corpora pennipotentum.

Nec

Nec enim ex alimonia, quam fera ex corporibus nostris depastis
quærun, pleniorum membrorum numerum consequuntur, nec no-
stra caro ab ijs depasta, membrum fit in ijs, aut speciem, vicemq;
membri exhibet. Substantiam enim in corporibus animantium
distingve ab illorum accidentibus: & propterea cum ex nostris
carnibus membra illorum, quæ qualitates, nutriuntur, & quæ quantita-
tem augentur, quæ essentiam tamen non mutantur. Ut igitur,
cum carnes bovis ventri ingerimus, nostra caro non inde fit bo-
vina, sed humana est & manet: quia effluit denuo, quod ingestum
est, calorq; noster natus in alimentum agit assumptum, ut hu-
morem aliquem inde, quo recreetur, extrahat, & omnia denuo
certis secessibus excernit: ita etiam nulla nostri pars à belua de-
vorata, sic conglutinetur beluæ, ut caro ejus dici jam queat huma-
na. Vorat illa indies nova alimenta: Prius adsumpta absumun-
tur, & in sua redeunt principia. Ex cibo igitur & pabulo essentia
viventium non conficitur, licet illa non sit sine cibo aut pabulo, &
ex illo aliter atq; aliter afficiatur, ut jam crescat, jam arescat, jam
frigeat, jam caleat. Substantia enim per pabulum adsumptum non
augetur, sed ejus quantitas. Et quamquam corporea est in-
nobis, tanquam ex elementis inter se concinne temperatis con-
stans, non tamen, dum homo moritur, ipsa sic interit, ut in nihilum
abeat. Quod igitur est de substantia corporis mei, me defuncto,
non desinit esse: nec desinit esse animus, qui corpus hic meum re-
git, ut ut ab eo dissolvendus. Deus igitur, si velit aliquando animo
varias sui corporis reddere particulas, post mortem quidem dis-
junctas, sed non annihilatas, facillime præstabit & nullo negotio.
Et si vel maximè Polyphemus aliquis me devoraverit, resuscitan-
di uterq; sumus, ille, ut luat pro immanitate pœnas; ego, ut, si pro-
bus morior, nihil sentiam tyrannidem meæ obsuisse felicitati.
Non desiderabo tunc ullum horum membrorum. Superflua non
habet Polyphemus. Uterq; integri resurgemus, nulla parte de-
perdita. Reddidit Polyphemus, quod de meo adsumsit: Et ego
reddidi, quæ de carnibus aliarum animantium depastus sum. U-
terq; sine admixtione peregrinæ substantiæ integri, perfecti & com-
pleti coram tribunali comparebimus, & sapiens ille naturæ Domi-
nus cineres nostros è sinibus suis evocatos longè facilius, quam ar-
tífex

rifex statuam auream contractam, inq; tenuissimos particulas di-
minutam, aut etiam Chymico artificio in pulveres aut aquas reso-
lutam, eo, quo pridem ordine & loco fuerant, disponet, ut nihil
membrorum mihi, nihil Polyphemo, nihil cuivis alij deesse queat,
juxta aureos versus Tertulliani, quibus vos valere jubeo.

Si quem forte rogis abolevit flamma sepulcrum,
Aut aliquem cœcis disjecerit æquor in undis,
Si cujusq; fame satiarunt viscera pisces,
Aut fixere feræ crudelia funera membris,
Alicibus jacuit raptato corpore sanguis,
Ultimo non Domino rapient sua munera magno.
Apparere Deo vivos de morte necesse est,
Reassumptisq; suis homines adstare figuris.





921116 **Bibliotheca** 105 000
P.P. Camaldulensium in Bielany

Depozyt w Bibliotece Jagiellońskiej



06393

S.VIII.33

